

Abraham Lincoln – il president da la guerra civila

DA JOHANN ULRICH SCHLEGEL

■ **Avant 150 onns, ils 12 d'avrigl 1861, ha il president american Abraham Lincoln provocà – cun spedir ina pitschna flotta en il sid dals stadis commembers che vulevan daventar independent l'istorgia mundiala: la guerra civila americana.**

Il cumbat dals colonists ed il progress


Abraham Lincoln, il 16avel president dals Stadis Unids da l'America, è naschi ils 12 da favrer 1809 sco figl d'ina povra famiglia da colonists e duaniers en il stadi da Kentucky.

Il giuven Abraham era in ferm matsch che stueva far greva lavur corporala e che n'aveva betg la chaschun d'emprender da leger e scriver endretg. Da quel temp devi mo paucas scolast ed anc damain scolasts che savevan dapli che gist leger e scriver. Decennis a la lunga n'è la vita da Lincoln betg sa differenziada da quella dad auters. Er auters en stads capabels da far quai che Lincoln ha dumagnà da far: tras in studi autodidactic al èsi reussi da cuntanscher l'admissiun sco advocat. En la vegliadetgna da 50 onns era Lincoln plirs tschients da miglias enturn Springfield, la chapitala – plitost in vitg ch'ina citad – dal stadi dad Illinois, in giurist renumà cun in'atgna pratica. Ina giada al ha il stadi schizunt tramess sco delegà en la chombra dals represchentants a Washington. Ma cunquai ch'el è strusch sa fatg valair en quel gremi, n'è el betg pli vegnì proponì per la reelecziun.

«Jau era sin il precint da perder l'interess per la politica», scriva el pli tard en ses curs da la vita.

Qua ha la populaziun americana cumenzà a discutir a moda adina pli cuntraversa davart la sclavaria. Ils Stadis Unids da l'America, apparentamain uschè cuntents, èn sa separads adina pli fitg: il nord ed il sid èn gia da vegl ennà sa svilupps a moda cuntraria quai che pertutga la geografia ed il socialesser. La sclavaria è mo stada il simtom il pli vesavel da quests cuntrasts che regivan mintgamai l'entira concepziun da vita.

Il nord ha marcà la naziun americana. Ils 4 da fanadur 1776 aveva la regenza dals Stadis Unids ch'èran vi da sa concepir danovamain decretà la proclamaziun decisiva a chaschun dal distargament da l'Engalterra: «Tut ils umans èn eguals ed han survegnì da lur creatur tscherts dretgs ch'els na pon en nagina maniera dar si.» Sut l'effect da questa proclama-



Oz avant 150 onns ha il president american Abraham Lincoln provotgà la guerra civila en l'America.

ziun tschiffa il baldachin dal retg fiu il 1789 en il rom da la Revoluziun franzosa. Quai è stà l'ura da naschientscha dals dretgs umans. La decleraziun dals dretgs umans però vegn purtada dal spiert da la Revoluziun americana dal 1776.

Dal tuttafatg autra era la moda da viver dals abitants da l'America dal sid. Quella vegn per exempel preschettata impressantamain en l'enconuscent cudesch e film «Vom Winde verweht». Ils stadis dal sid eran marcads da las grondas plantaschas e la lavur sin quellas pretendeva ina massa enorme da forzas da lavur. Quella lavur faschevan ils sclavs da pel stgira. Il sid era dal punct da vista economic in grond furnitur agrar da materia prima, cuntent cun sasez, conservativ, sceptic envers il mund en general ed envers las tendenzas novas en spezial.

Ils 6 da november 1860 vegn tutten-

ina Abraham Lincoln tschernì sco il nov president dals Stadis Unids da l'America. Ins na po betg s'imaginar bumbasticamain avunda questa sfratgada che ha marcà ils decennis sequents da l'istorgia mundiala. L'elecziun da Lincoln sco president ha cun ses effect e sia persistenza immensa pir fatg dal mund quai ch'el è ozendi.

Cura che la debatta è stada lantschada danovamain enturn il 1850 en il pajais, ha il politicher – che sa sentiva gist anc stanchel e stuf – cumenzà a cumbatter cun tutta forza. Ses peds eran tuttenina uschè profunds, expressivs e persvadents sco anc mai. Gia quai che pertutga ses enorm scheni linguistic litterar sto Abraham Lincoln vegnir considerà sco in dals pli impurtants acturs da l'istorgia mundiala. Il 1856 è el daventà commember da la partida republicana gist

fundada. Entant che la partida aveva a l'entschatta plitost ina tenuta da cumpromiss envers la dumonda da la sclavaria, l'ha Lincoln manevrà sin ina via da la rigurusadad morala. Cumbain ch'ìls republicans al avevan nominà sco candidat per la presidenza, al ha dentant tuttina mo ina minoritad tschernì.

L'elecziun da Lincoln è stà in signal per ils stadis dal sid da sortir da l'unìun. Ils 8 da favrer 1861 èn quels s'alliads als stadis confederads. Consequentamain era la situaziun americana la suandanta: 23 stadis dal nord cunter 11 stadis dal sid.

La guerra tranter ils stadis dal nord ed ils stadis dal sid

Gia adina ha il destin da la populaziun afroamericana messa en sclavitid disturbà Lincoln.

El ha avvertì: «Jau na fatsch betg appel per ina guerra civila. Tut quai che jau vi – uss ed uschè ditg sco quai che jau viv – è da tegnair ad aut il nobel princip da nosa democrazia. Quel ans ha fatg gronds ed ans po anc far pli gronds.»

L'aspect da l'aversiun cunter la sclavaria è dentant mo ina vart da la medaglia presidiala da Lincoln. En sia saramentaziun ils 4 da mars 1861 exprima Lincoln a moda pli averta sias smanatschas envers ils stadis dal sid quai che concerna il mantegniment da l'unìun: «La regenza na vegn betg ad attatgar vus. Vus na pudais betg avair in conflict senza esser sezs ils attagaders.»

Anc n'udiva nagin quests clers avertiments dal president. Il process da liberaziun en il sid cuntinuava ad in cuntinuar. Ils stadis dal sid han tschernì l'anteriur minister da la defensiu Jefferson Davis sco president. La regenza federala aveva mo pli ina suletta basa: la fortezza Fort Sumter. Qua hai dà ina stretga da victualias en la fortezza. Lincoln ha decidì da deblocar l'insletta en il sid. È quest agid propi stà uschè nunprivlus e nummilitar che Lincoln n'ha vis davostiers nagina accziun guerrilla? U èsi stà in tric d'avvocats per provocar l'adversari ed al attribuir la responsabladad d'avair fatg l'emprim act da violenza? Anc avant che la pitschna flotta da Lincoln aveva cuntanschì Fort Sumter han ils renegats sajettà sin sia bandiera stailida, han bumbardà la fortezza e l'han sfurzà da capitular.

Lincoln ha pront reagì cun gronda indignaziun. Anc il medem di ha el clamà en servetsch 75 000 guerriers voluntaris ed ha mobilisà l'emprima armada.

Lincoln ha exprimi cleramain sias fi-

namiras da guerra prioritarias. Gia l'onn 1858 ha el gi ditg che «era sch'el avess tut la pussanza dal mund, na savess el betg tge far cun la sclavaria là, nua ch'ella exista». Alura scriva el litteralmain: «Mia gronda finamira è da mantegnair la federaziun, betg da mantegnair u d'abolir la sclavaria.» Anc pli concretamain s'exprima el durant la guerra en in scriver a l'editur da la gasetta New York Tribune: «Mia finamira predominanta en quella guerra è da salvar l'unìun, betg da salvar u da destruir la sclavaria. Sche jau pudess spendrar l'unìun senza deliberar in sulet sclav, faschess jau quai; e sche jau la pudess salvar cun deliberar tut ils sclavs, faschess jau era quai; e sche jau la pudess spendrar cun deliberar intgins sclavs ed auters betg, lura faschess jau era quai.»

La guerra civila è daventada ina da las accziuns las pli sanguinas da l'istorgia mundiala. Ella ha chaschunà 360 000 unfrendas en il nord e 275 000 victimas en il sid. Malgrà il cler avantatg dal nord ha la guerra durà quatter onns. Entant han las pussanzas europeicas svilupps il plan da gidar ils confederads. Per prevenir a questas intervenziuns europeicas ha Lincoln prendì ina mesura da la politica interna cun effects per la politica exteriura. L'entschatta da l'onn 1863 ha el decretà in'ordinaziun, tenor la quala tut ils sclavs dals stadis extrads da l'unìun sajan libers. Quella decisiun è stada il segund grond rampign d'avvocats en questa guerra. Ils abitants dals stadis dal sid cumparevan uss en la glisch d'in adversari che fascheva guerra per mantegnair la sclavaria. E tenor l'opiniun publica da quel temp na pudeva nagina regenza europeica s'alliar cun in tal adversari.

Pir en la guerra e mo sco med per cuntanscher sia finamira ha Lincoln pussibilità la liberalisaziun da la sclavaria a la populaziun da pel stgira.

Il pretsch che Lincoln ha stuì pajar per ses agir è stà aut. El vegniva odià d'ina gronda massa dals abitants dal sid. Ils 15 d'avrigl 1865 è el vegnì sajettà giu d'in abitant d'in stadi dal sid.

En il center da la prestaziun da Lincoln stat il mantegniment da l'unitad americana. Sco schefcumandant cun in'immensa resoluzezza e sang fraid ha el adina danovamain dirigi e per finir era guadagnà la guerra. Igl è senza dubi l'ovra fundamentala dad Abraham Lincoln che l'America sco suletta pussanza mundiala dominescha per gronda part nus e l'entir mund e che n'existan betg duas forzas mesaunas en l'America dal nord sco la Brasilia e l'Argentina en l'America dal sid.



Ad Abraham Lincoln èsi reussi da mantegnair l'Unitad da l'America.



Lincoln cun ses figl. La guerra civila en l'America è stada ina da las pli sanguinas accziuns da l'istorgia mundiala.